

Sinar Harian - 29 Mac 2016

# 32 pemanah rebut slot AUG 2016

Hanya 16 atlet bakal bawa cabaran negara di Singapura pada Julai depan

■ ZUBIR SULAIMAN

KUALA TERENGGANU — Seramai 32 pemanah terbaik negara dari sembilan universiti di dalam negara menyertai sesi pemilihan bagi menyahut cabaran dalam sukan memanah ke Kejohanan Universiti Asean (AUG) yang bakal berlangsung di Singapura Julai depan.

Selaku Pusat Kecemerlangan Sukan (PKS) Memanah, Universiti Sultan Zainal Abidin (UniSZA) sekali lagi diberi kepercayaan oleh Bahagian Sukan, Kementerian Pendidikan Tinggi (KPT) untuk membuat persiapan seterusnya menguruskan pasukan memanah Institut Pengajian Tinggi (IPT) negara pada edisi ke-18 nanti.

Pengarah Pusat Sukan & Rekreasi UniSZA, Pengarah Pusat Sukan & Rekreasi UniSZA, Riduan Mohamed Arof berkata, sesi pemilihan selama empat hari itu merupakan inisiatif awal pihaknya dalam membentuk sebuah pasukan yang mantap ke kejohanan tersebut dalam usaha memburu kejuaraan musim ini.



Sebahagian daripada atlet yang bersaing pada sesi pemilihan pertama sebelum melayakkan diri bagi membawa cabaran negara ke Kejohanan Universiti Asean (AUG) edisi ke-18 yang bakal berlangsung di Singapura Julai depan.

Menurutnya, sebelum ini pihaknya telah memantau kesemua atlet dibawah program PKS sukan memanah menerusi pelbagai kejohanan utama sama ada di peringkat universiti mahupun kebangsaan sejak setahun yang lalu.

"Hasilnya kita telah mengenal

pasti seramai 32 orang atlet yang berjaya memperkenalkan prestasi konsisten dan mereka ini kita himpunkan di UniSZA bagi menjalani sesi pemilihan yang berpusat di Lapang Sasar PKS Memanah UniSZA.

"Daripada jumlah itu, hanya 24 atlet telah disenarai pendek untuk

menjalani sesi pemilihan kedua yang bakal diadakan di Universiti Putra Malaysia (UPM) pada awal bulan depan sebelum menyertai kem latihan pusat selepas itu," katanya ketika diintervju di sini, semalam.

Dalam pada itu, Riduan yang juga pengurus jawatankuasa panel

pemilihan berkata, hanya 16 atlet sahaja yang bakal diberi tanggungjawab bagi membawa cabaran negara ke kejohanan tersebut.

Justeru pihaknya perlu membuat pemilihan dengan lebih teliti dalam pelbagai aspek sukan berkenaan bagi memastikan pasukan memanah mampu menyumbangkan pingat emas buat kontinjen negara.

"Ini kerana sukan memanah merupakan sandaran utama bagi negara sebagaimana pada kejohanan-kejohanan sebelum ini dan mengharapkan atlet yang terpilih itu nanti dapat merealisasikan hasrat untuk berada dalam kelompok terbaik sepanjang ternyata sukan itu berlangsung," katanya.

Pada program itu, antara atlet memanah yang terlibat termasuklah daripada UniSZA, UPM, Universiti Malaysia (UM), Universiti Teknologi Mara (UiTM), Universiti Sains Malaysia (USM), Universiti Islam Antarabangsa Malaysia (UIAM), Universiti Malaysia Pahang (UMP) dan juga Universiti Tenaga Nasional (UNITEN).